



● EDITORIAL ● RÂL VÊNGTU ● CHHÛNGKAW CHANCHIN

- ✚ Barak Mission Presbytery hawn a ni
- ✚ Harhna chungchânga inrâwn khâwmna nei dâwn
- ✚ KṬP Youth Recreation Centre (YRC)

RNI 68092/83 Regn. No. N.E. 1024
From
Synod Literature & Publication Board
Synod Office, Aizawl - 796 001,
Mizoram. Phone - 0389-2324590

SYNOD *Newsletter*

Volume XXIX

No. 382

E-mail : synodnews@gmail.com

JULY, 2015

KOHRAN HMA THLÎR CHUNGCHÂNGA INRÂWN KHÂWMNA

❖ *Kohhran hruiatuten an ngai pawimawh a, kal tûra beisei an kal tha hle*

Kum 2014 Synod Inkhâwmpuiin Aizawl Chhimthlang Presbytery aṭanga thu lût Kohhran hma thlîr chungchânga inrâwn khâwmna buatsaih rawtna chu thil pawimawh tak nia ngaiin SEC bawh zui tûrin a dah a (2014 Synod Gen.6). SEC chuan a tûl anga hma laa lo bawh zui tûrin OM a ruat leh a (SEC 255:12). OM chuan mi tam zâwkin zau deuh taka ngaii dân thawhna remchâng siamsak ṭhaa hriain Mizoram hmâr lamah District hmunpui zêlah leh Mizoram chhim lamah Lungleiah he inrâwn khâwmna hi June ni 30, 2015 khân a buatsaih ta a ni.

Inrâwn khâwmna hmun hrang hranga buatsaih hi Synod Officers' Meeting member-te leh thupui sawi hawngtu atâna ruatten an ho ṭheuh va; inrâwn khâwmnaah hian Presbytery tin Moderator leh Secretary te, Bial tin Chairman leh Secretary te, Pastor, Pro Pastor leh Minister te, Synod Executive Committee (SEC) member te, Kohhran tin aiawh pakhat ṭheuh te leh a thlengtu Kohhran Committee-te tel tûra tih an ni a; kal tûra beiseite an kal ṭha thawkhath viaw vek. Hmun hrang hranga kal dân chu hetiang hi a ni:

Aizawl District	-	592
Champhai District	-	241
Chhim Area (Lunglei)	-	167
Kolasib District	-	138
Mamit District	-	144
Sêrchhîp District	-	144
Kal zawng zawng	-	1,426

Synod Officers' Meeting (OM)-in Kohhran Hmathlîr Chungchânga Inrâwn Khâwmna sawi hawnna thuziak, lehkhahu tē (booklet)-in a siam a, chu chu chhiar chhuah a nih hnuin sawi ho tûra tihte chu group-a inṭhena sawi ho zui a ni. Sawi hawnna bu tēah hian Welsh Missionary-ten Mizorama rawngbâwlna an lo kalpui tawh dân tlângpui târ lan hmasak a ni a; tûna Mizoram Synod dinhmun tlângpui sawi zui leh a ni a, kan thil kalpui mēk inen lēt deuh tûl nia hriatte sawi a ni leh a. Kohhran ṭhang zêl leh khawvêl hmasâwnnain a ken tel thil tih ṭhar ngai nia langte sawi a ni bawk. A tâwpa inbih chian a tûlna chhan thu hlâwm li târ lan chu hēngte hi a ni:

1. Nikum 2014-2015 chhûnga thla tina kan sum mamawh chawh rual chu ₹ 18,21,68,295 a ni a; kan hmuh aiin kan hman a tam zâwk reng a, sum hnâr nghet sawi tham kan nei si lo va, kan dinhmun hi a ṭha vak lo. Sum hman bâng (balance) pawh kan nei tlēm tial tial a, hetiang hi kan dinhmun a nih avângin thilpêkah pawh nasa leh zuala kan ṭan a ngai.

2. Mihring rilru a inthlâk danglam nasa, tûn hma chuan miin kohhran mitmei an vêng a; tûnah chuan kohhranin a member-te mitmei a vêng na ta viaw. Kohhran tâna ṭha tûr aiin member-te duh zâwnga kal kan tum nasa ta. Tûn hma chuan thunun lâk luh tûrte khân kohhran mit tûn loh hlauvin ṭan an la ṭhîn a; tûnah chuan kohhranin lût tûrin a nawr a ngai ve ta thung.

3. Pêk aiin dawn tumna rilru a lian ta hle. Tûn hma chuan miin rilru thianghlim takin thilpêk an pe mai ṭhîn a; tûnah chuan kan Synod aṭanga dawn tumna rilru kan pu tel deuh ta tlat mai. Tûn hma chuan miin kohhran mamawh zâwng an neih pawhin rawngbâwlna rilru puin a man pangngai aia tlâwmin an leitîr ṭhîn a; tûnah chuan Synod lei tûr a nih chuan mi dang leina aia to fea a man chhiar duhna thinlung kan pu ta.

4. Sakhuua kan rinawmna a tla hniam a, Politics-in kan rilru a hruai nasa. Thuawihna kan tlachham sâwt hle a, Synod rorêlna hnuiaia kûn zêl aiin kan duh dân awm kan pawiti lo sâwt. Hetiang zêla kan kal chuan Synod tân pawh thil rêl a har tial tial dâwnin a lang. Chuvângin thu awih leh rinawm kan zir ṭhar a ngai leh ta hle a ni.

Sawi ho tûrin thil chi nga chhawp chhuah a ni a, chûngte chu – Pastor Bial ṭhen têt zêl tûl tih leh tih loh leh Bial khata Kohhran awm zât tûra ṭha tih dân te; Inkhâwm kalpui mēk dân tihdanglam tûl tih leh tih loh te; Synod sum dinhmun enin inhrêk deuh tûl tih leh tih loh te; Kohhran indanna leh din nghehna sum budget-a dah chhunzawm zêl chungchâng te; Synod Office Administration lian tak hi tihzângkhai deuh tûl tih leh tih loh te a ni.

Aizawl District chuan Mission Vêng Kohhran Biak Inah an hman a, Synod Secretary, Rev. B. Sângthanga'n kaihruiin Upa H. Ronghaka, Synod Secretary (Jr.)-in sawi hawnna thu a chhiar a; thu ziaṭ aṭanga zawhna awmte chhân leh inhrilh fiah a nih hnuah Group 30-a inṭhenin sawi ho hun hi hman a ni. Sawi ho tûra chhawp chhuah bâk sawi duh nei tâna hun hawn rilrûk a ni naa, Group hrang hrang report hun chhûng a rei deuh avângin hetiang sawina hun hi a awm thei ta lo va; chuti chungin Group-a sawinaa an vei zâwng sawi tel an awm tho bawk. Mamit District lama tel tûra tih, Chhimthlang Presbytery chuan an tâna remchâng zâwka ngaiin Aizawl District lama tel an dîl angin remtihsak an ni a; kawng chhiat avângin Sêrchhîp District lama tel tûra tih ṭhenkhat an tel bawk.

Champhai District chuan Champhai Vêngthlang Kohhran Biak Inah an hman a; Rev. Dr. R. Lalbiakmawia, Synod Finance Officer-in kaihruiin Upa Vâvêngmawia, Synod Statistician-in

Phêk 2-na dinglamah zawm...

SYNOD Newsletter**EDITORIAL STAFF**

Rev. K. Lalpiangthara (LPT)
 Rev. Thangzauva (TZ)
 Upa H. Ronghaka (HR)
 Upa Khawlungnunga (KCN)

Editorial **KUTDAWH RILRU**

Kutdawhho hian 'kutdawh' tih takah pawisa leh therhlo an hmuh theihna tûr chi hrang hrang an ngaihtuah ve thîn a. Tlêma lo khawngaih theitute leh kutdawh nâna hmun remchâng deuhte an hre thei ve hle thîn. An rilru luahtu ber chu a thlâwna mi thilpêk dawn tum a ni deuh ber mai.

Kan ram a lo changkâng chho ve zêl a. Thil tha tak tak leh itawm tak tak a tam ta hle a, mi thil neih awta chil pût kan pung tual tual niin a lang. Mi cellphone ang, mi TV ang, mi computer ang, mi bike ang, mi motor ang, mi in ang, mi sound system ang leh mi Biak In ang duha tuihâl ru kan tam tawh âwm asin! Biak In sakna tûr in dîl chawt chawtte pawh hi kan hreh lo tawlh tawlh niin a lang. Kan hotute zin pawh hian dai per palh theih thang a tam sâwt hle niin an sawi. Kohhran dinhmun ang tâwka sound system neih te leh Biak In neih te pawh hi kan zir thar leh a tûl ta hlein a lang. Mite khawngaihna dawngtu nih aiin mite tanpui theitu nih hi kohhranhote hian i tum zêl zâwk ang u.

ṬAWNGṬAIPUI TÛRA NGENNA

Synod Revival Committee leh Central YMA ṭang kawp chuan ruihhlo avânga harsatna tâwkte tân Chhanchhuahna Camping a buatsaih dâwn a. Kohhran mite ṭawngṭaipui tûrin a ngên a ni.

A hun : August 4-23, 2015

A hmun : Art & Culture Hmun
 Berawtlâng

Speaker : Pu Lalsânglûra Râltê
 Son of God Team

Sd/- Director
 Synod Revival Department

SÂWMNA

Ni 1-9 August, 2015 khian Diakkâwn Kohhran chuan kum 60 an tlinna (Diamond Jubilee) ropui taka lawm an tum a. Hemi hunah hian an Biala Pastor leh Pro Pastor lo awm tawh zawng zawngte leh Diakkâwn Kohhrana lo lawi tawh zawng zawngte tel vek tûrin an sâwm a che u.

Phêk 1-na chhunzawm...

sawi hawnna thu a chhiar a; Group riata inṭhenin sawi hona hun ṭha tak hman a ni a; sawi ho tûra chhawp chhuah bâkah a telten an vei zâwn an sawi nasa viau niin thu kan dawng. Lehlânga kal an tam deuh a; zân inkhâwm pawh buatsaih a ni lo.

Chhim Area chuan Lunglei Chanmari Kohhran Biak Inah an hmang a, Synod Moderator Rev. Lalrinmawia'n a kaihruai a, Chhim Area Administrative Secretary Rev. F. Lalrinnunga'n sawi hawnna thu a chhiar a, Group lia inṭhenin sawi ho tûrte sawi zui a ni. Chhim tâwp lam aṭanga he hun hmang tûra kalten kawng chhiat avângin an nang ve hman lo a; bân tawh hnu, tlai dâr 5:00 vêla thleng ta tho pawh an awm! A thlengtu Kohhranin inrâwn khâwmnaa kal zawng zawngte zanriah a buatsaihsak a; Thawhtanni zânah leh Thawhlelni zânah inkhâwm an buatsaih baw a; Synod Moderator-in Pathian thuchah a sawi.

Kolasib District chuan Diakkâwn Kohhran Biak Inah an hmang a, Synod Finance Officer & Executive Secretary Rev. Lalramliana Pachuau-in a kaihruai a, Synod Moderator Elect, Rev. H. Lalrinmawia'n sawi hawnna thu a chhiar a. Group lia inṭhenin sawi honaah an tui hle a, sawi ho tûra chhawp chhuah bâk pawh an sawi nasa. Zân lamah inkhâwm buatsaih a ni a; Diakkâwnah Rev. Lalramliana'n Pathian thuchah a sawi a; Rev. H. Lalrinmawia pawhin Vênglai Kohhranah Pathian thuchah a sawi baw.

**HYDERABAD-AH
PASTOR BILLY LALRINCHHANA**

Hyderabad-a awm tûra 2014 Synod-in a dah Pastor Billy Lalrinchhana (M.Th. zir zo) chu June 13, 2015 (Inrinni) tlai dâr 5:00-ah Good Shepherd Community Church, (OM India Hqrs., Bangalore)-ah Rev. Dr. R. Lalbiakmawia, Synod Finance Officer-in Induction Service a neihpui a, Upa H. Ronghaka, Synod Secretary (Jr)-in a ṭawiawm. Mizo zirlai awmte nipui chawlh hmanga Zoram lama an haw lai a nih avângin Induction Service-ah hian mi 50 vêl an inkhâwm. India ram khawpui hrang hranga Kohhran mite enkawla an mamawh anga puih hi Synod-in rawngbâwna pawimawha ngaiin Bangalore, Mumbai, Delhi, Kolkota leh Hyderabad-ahte Pastor dah an ni ta a; Kohhran mite an phûr a, Pastor-te pawh an hmang ṭangkai hle niin thu kan dawng.

Mamit District chuan Mamit Kohhran Biak Inah an hmang a, Senior Executive Secretary Rev. Lalzuithanga'n a kaihruai a, Upa R. Lalmalsawma, Gen. Manager, PRESCOM-in sawi hawnna thu a chhiar. Group lia inṭhenin sawi ho tûra chhawp chhuah leh thu dangte pawh zau deuh takin an sawi ho va; Thawhtanni zânah leh Thawhlelni zânah inkhâwm an buatsaih a, thlen kim zânah Rev. Lalzuithanga'n Pathian thuchah a sawi a, Thawhlelni zânah Upa R. Lalmalsawma'n Pathian thuchah a sawi baw.

Sêrchhîp District chuan Sêrchhîp Kâwnpui Kohhran Biak Inah an hmang a, Rev. P.C. Pachhunga, Executive Secretary-in kaihruaiin Rev. Dr. C. Lalhlira, Principal, ATC-in sawi hawnna thu a chhiar a, Group rukah inṭhenin an sawi ho va, sawi ho tûra tih bâk sawi hawnna bu chhûnga mi an sawi tam hman viau. Thawhlelni zânah inkhâwm buatsaihin Rev. P.C. Pachhunga'n Pathian thuchah a sawi.

Inrâwn khâwmna hmun hrang hranga thu sawi hote hi recorder-ten hlâwm chhuakin Synod Office-ah an theh lut tawh hlawm a; OM/SEC-in bawh zui ngaite chu la bawh zui leh tûra ngaih a ni. A thlengtu tûra ruat Kohhranten ei leh inah leh thil dang dangah nasa taka insêngsova buaipui ngaite fel taka an lo buaipui vek avâng leh mawhphurtu ruatten ṭha taka an tih tûra beiseite an lo tih fel avângin Synod OM chuan lâwmawm a ti tak meuh a; he inrâwn khâwmnaa kal zawng zawng chungah pawh lâwmthu a sawi a ni.

**VIJAYANAGAR KOHHRAN
ENKAWLTU ATÂN
PU LALRINSANGA**

Arunachal hmâr thlang tâwp Myanmar ram depa awm Vijayanagar khuua Presbyterian Kohhran mite enkawl tûra ruat Pu Lalrinsanga, Vijayanagar chuan thla khat chhûng Pastor Lalchhâwnkima kaihruaina hnuaia hun a hman hnuin ni 6.7.2015 khân SEC/OM thu angin Kohhran serh leh sâng khawih phalna (Licence) a kutah Synod Secretary-in a hlân. Vijayanagar-ah hian tûnah Mizo chhûngkaw thum awmin Presbyterian Kohhrana lawi chu 30 vel an ni a; inkal pawhna a ṭhat loh avângin Arunachal Mission Field Pastor-te tân a buaithlâk hle a; helicopter kalna remchâng a awm loh phei chuan kea ni ruk lai kal ngai a ni. Hei vang hian Synod chuan a bika enkawl dân tûr siamin Pu Lalrinsanga chu Kohhran serh leh sâng khawih theihna a pe ta a ni.

Râl Vêngtu

Râl Vêngtu chuan thla hmasaa a entlanga a thlir loh lam - khaw chhak lam leh khaw thlang lam a han thlir kual ve leh thung a. Mite chuan, “Engte nge i hmuh?” tiin an han zâwt a. Râl Vêngtu chuan:

- Sâwma pakhat pete zingah Pathian ram aia Tualchhung lama invulh vak ching te,
- Rawngbâwtute zingah chung lam aia TV en tam zâwk te,
- Kohhranho zingah rorêlna aia lâm hlimna rau zâwka ngai tlat te,
- Office kal thinte zingah office hna aia mahni hna ngai pawimawh zâwk te,
- Thinslung quinine hmuï chini an tihho te,
- A rêl lama puitling tak, bawh zuina lama nausên tlat si te,
- Mei zu lo tura intiam zu ru leh tho si te,
- Hunbi kêra thawk, hun vawn dik ngai pawimawh miah lo te,
- Hotute dai per tûr thang kam thiam tak kohhran te,
- Rual awh luat avânga sum hmanga Lal Isua hralhtute - tiin a chhâng a.

Mite chuan, “E khai, i entlang chu a tha hle mai, neih thing-lung-khâwng pawha lei ve chi a nih chu,” an ti a, an kal liamsan ta a.

NGENNA

Ram pum huap Kohhran History atâna Document pawimawh vawn that nei kan awm chuan Synod Archive Document atâna thawh tûrin kan inngên a. Office-a rawn dah harsat te tân contact no. 9612-587-458 emaw 9436-152-592-ah emaw hriattir theih a nih chuan a lâwmawm hle ang. -Archivist

PCI HOTUTE LEH SYNOD HOTUTE INHMU KHÂWM

June 24, 2015 (Nilaini) khân PCI hotute leh Synod hotute chu Tripura Synod hawn tûr chungchângah an inhmua khâwm a. Kum 2016-a Tripura Synod hawn tûra hmachhawpa neih mêk chungchângah thil sawi ho ngaite sawi ho a ni a, heng an sawi honate hi PCI Executive Committee-ah leh General Assembly 2016-a neih tûrah chhawp chhuah leh a ni ang.

REV. K. LALHMINGLIANA A CHÂWL TA

Rev. K. Lalhmingliana (63), Khatla chu July 1, 2015 khân Synod Hospital, Durtlângah thisen cancer avângin a thi a. A tûk July 2, 2015 khân vui liam a ni. Rev. K. Lalhmingliana hian Mizoram Presbyterian Kohhran Synod hnuaiawh rawngbâwlna hna pawimawh tak tak a lo chelh tawh a, kumin 2015 aţang hian pension-in a chhuak a ni.

www.mizoramynod.org

SYNOD HOSPITAL, DURLÂNG APRIL, 2015 CHHUNGA THILPÊK DAWNTE

I. CHARITY FUND

1. Pu Rosâwmliana, Durtlâng Leitân	₹ 1,000/-
2. B. Lalthanliana & H. Zaihnûni, Khatla	₹ 5,000/-
3. Pu Peter Lalmâma, Leitân 'S'	₹ 2,000/-
4. KTP, Ramhlun North Bial	₹ 20,000/-
5. Pi Lalrochhîngi, Zâwlnuam Thuampui Vêng	₹ 1,000/-
6. N.E. Khawdungsei Kohhran	₹ 5,000/-
7. Lalrinawmi, Zârkawt	₹ 2,700/-
8. Pu Lalsanglûra, Durtlâng Mêl - 5	₹ 1,500/-
9. Marpara Ramthar Bial Kohhran Hmeichhia	₹ 2,000/-
10. Mission Vêngthlang Bial	₹ 16,740/-
11. KTP, Chawnpui Bial, Khawbung	₹ 3,000/-
12. Champhai Kahrawt Kohhran	₹ 13,319/-
13. Zothanpuia, Zârkawt	₹ 5,000/-
14. Lungdai Kohhran	₹ 1,000/-
15. Pu Laldanglova, Durtlâng Mêl 5	₹ 1,000/-
16. Pu Lalramena Râitê, Durtlâng Dâwrkâwn	₹ 1,000/-
17. Luangpawm Kohhran Ramthar Committee	₹ 2,000/-

II. GRACE HOME TÂNATHILPÊK-TE

1. Zaitanpuia, Zârkawt	₹ 3,000/-
2. Zonua Kohhran Hmeichhia	₹ 10,000/-
3. Zonua Bial Kohhran Hmeichhia	₹ 10,000/-
4. Luangmual Bial Kohhran Hmeichhia	₹ 10,000/-
5. Thenzâw Bial Kohhran Hmeichhia	₹ 5,000/-

III. THISEN PE TE

1. KTP, Edenthar Branch	30 Units
2. KTP, Rûlchâwm Branch	49 Units
3. KTP, Sateék Pastor Bial	69 Units
4. KTP, Dinthar Vêngthlang Branch	34 Units
5. KTP, Dârlung Bial	53 Units
6. Tanhril Vêngthar Kohhran	24 Units

IV. DONATION

1. KTP, Diakkawn Bial, Kolasib	₹ 15,000/-
--------------------------------	------------

2. Pu Ch. Kâpa, Ramhlun Vênglai	₹ 110,000/-
	Hospital sak tanpui nan
3. KTP, Zemabaw 'N' Bial	₹ 10,000
	Pi Pui In (Private Ward)
	Bedside Locker 2 lei nan

V. THILDANG PETE

1. Cookie Jar, Châmari, Châltlâng Road	Dam lo ei tûr chhang
2. KTP, Phûdungsei Bial	Hmunphiah 40
3. Phûdungsei Bial Kohhran Hmeichhia	Hmunphiah 40
4. KTP, Kawrthah Bial	Hmunphiah 145
5. Bûkpui Bial Kohhran Hmeichhia	Hmunphiah thahnem tak
6. Rev. R. Lalthanmawia, Khatla	Library atân lehkhahu 2
7. Zuangtui Kohhran Hmeichhia	Lawmna Ward tân Floor Fan 2
8. Pu Joseph Lalchhanhima	Naupang Ward tân
Dinthar, Aizawl	Filter 2 - An fanu
	Dolly Lalruatfeli kum 1 tlin lawm nân.
9. Tuikual 'C' Welfare, Aizawl	Chokaa hman tûr
	Stainless Steel Thleng 200
10. Pu Jerry Lalduhawma Hnamte,	Naupang Ward atân
New Cptl. Complex, Khatla	Emergency Light 2 & Chair 1

Khawngaihna leh duhsakna avânga thilpêk min petu zawng zawngte hnênah kan Lalpa Isua Krista hmingin lâwmthu kan sawi tak meuh meuh a. Hêng in thilpêk kan dawnte hian awm man harsa tam tak a phuhrûk sak bâkah Hospital mamawh nasa takin min tiphuisui bawh a ni.

Sd/- REV. R. RAMDINMAWIA
Chaplain
Synod Hospital, Durtlâng

NOTE: June thla Synod Newsletter-ah May thlaa thilpêk dawn tihchhuah a nih avângin tûnah hian April 2015-a dawn chhuah a ni. - Editorial Staff

BARAK MISSION PRESBYTERY HAWN A NI

Nikum 2014 Synod-in Presbytery thar hawn tûra a rêl zînga mi, Barak Mission Presbytery chu June 19, 2015 (Zirtâwpni) khân Silchar Mission Compound Chapel-ah Synod Moderator, Rev. Lalrinmawian a hawng. Synod Moderator-in thuchah a sawi bâkah Synod Mission Board Secretary, Rev. Lalchhuanmawian thuchah tawi a sawi bawh.

Presbytery thar hawnnaah hian Barak Area-a project neia hma lo la thîn Kohhrante sâwm an nih angin Kohhran 10 aţangin Kohhran aiawh an kal thei a; a hawnnaa inkhâwm zawng zawng chu mi 430 vêl an ni. He Presbytery tharah hian Pastor Bial panga an awm a; Kohhran puitling 14, Preaching Station 12 leh House Fellowship 10 an awm. Moderator thar atân Rev. G.S. Ropianga ruat a ni.

MASIHI SANGATI EVANGELIST TIRH CHHUAH

Masihi Sangati Kendra hnuaiawh thawk tûra lâk thar mi 14 ten June 22-26, 2015 chhûng khân MSK Office, Bâwngkâwn-ah Orientation Training an nei a. Thawktu tirhchhuahna inkhâwm hi Aizâwl Vênglai Kohhran Biak Inah June 28, 2015 (Pathianni) chawhnu inkhâwmah hman a ni.

HARHNA CHUNGCHÂNGA INRÂWN KHÂWMNA

Synod Revival Committee rawtna bawh zuin Synod OM chuan ni 21.7.2015 hian Synod Conference Centre, Aizâwlah tûnlai harhna chungchângah inrâwn khâwmna a buatsaih dâwn a. Thupui sawi hawnna thu zia k tûrin Rev. Lalzuithanga, Sr. Executive Secretary i/c Pastoral, etc. ruat a ni. Heta tel tûr hian Aizâwl khawpui chhûnga Bial vawng Pastor zawng zawng, Aizâwl khawpui chhûng Pastor Bial tin aţangin mi pahnih theuh leh Kêlkâng Bialtu Pastor leh Kêlkâng Kohhran aiawh pakhat beisei an ni. A kalte Sitting Allowance pêk an ni ang a; hemi atâna thil tûl buaipui tûrin Synod Office ruat an ni.

MKHC-IN YOGA CHUNGCHÂNG SEMINAR A BUATSIAH

July 17, 2015 hian Mizoram Kohhran Hruaitute Committee (MKHC) chuan Synod Conference Centre, Aizâwlah Yoga chungchâng Seminar a buatsaih a; Mizoram Presbyterian Kohhran aţangin mi 100 intir tûra an beisei angin OM chuan Aizâwl khawpui chhûnga Bial vawng Pastor zawng zawng leh Aizâwl khawpui Pastor Bial tin aiawh pahnih theuh tel tûrin a ruat. He Seminar hi MKHC-in a ngen angin Synod-in a thleng a ni.

SUNDAY SCHOOL KAIKIM TIHCHIAN THU

MSSU Inkaihhraina Bung 8:3(3)-a "Kohhran danga pêm leh Hostel-a awmte chuan an awmna hmasaa an kai tawh chu an chhunzawm thei ang," tih a ni a. Hei hi MSSU Executive Committee 102-na thurêl No. VI-na chuan hetiang hian a hrilhfiah:

- (1) Sunday School kaikim tih hi **MSSU zawmtu Kohhran Sunday School-a kai kim** tihna a ni.
- (2) Hostel-a awmte hian pêm ang bawkin an awmna hmasa (Pem/Hostel-a luh hmaa an awmna Kohhran) a an kai tawh chu Kohhran Sunday School Secretary hriatpuina lehkhah lain an chhawm thei a, an Kohhrana an kir leh hunah pawh Hostel-a a awm chhûnga a lawina Kohhran Sunday School Secretary hriatpuina lehkhah a la tûr a ni.
- (3) MSSU zawm lova Hostel-in Sunday School an siam chu hei hian a huam lo vang.

SYNOD CAMPUS MINISTRY (Zirlai/Zirtirtu te nun kawng hrang hranga harsatna neite tanpuitu)

I nunah harsatna i nei em? In chhûngkua leh chênpuiteah harsatna i tâwk em? I zirlaiah harsatna i nei em? I tûn hman nun hman dik loh khân a la tibuai fo thîn che em? I kawppui/ngaihzâwng lakah harsatna i nei em? Eng kawngah pawh harsatna i neih chuan **Synod Campus Ministry Helpline number 9856883377** ah hian emaw Director No. 9436153801 ah emaw SMS, Call, whatsapp hmangin rawn thlen rawh le. Nangmah tanpui tûrin eng tik lai pawhin an awm renga e.

Synod Campus Ministry hi School atanga University zirlai leh zirtirtute tâna rawngbâwl a ni a, nun kaihhraina leh zirna tihmasâwna, career guidance te, rinna nun puitling nei tûra kaihruai tûrin Retreat, Seminar, Workshop, Consultation, Bible Study, Teachers' Refresher Course, etc School, Institutions leh hmun dangah an neihpui thei reng a, a duh tân sâwm theih reng a ni bawh.

Email: campusministry123@gmail.com

Sd/- Rev. Lalchungnunga
Director

"Pum chhûnga ka siam hmâ chein ka hria che a,
chhûl ata i chhuah hmâ pawhin
ka serh hrang che a, hnamte hnêna
zâwlneiah ka ruat tawh a che," tiin.
- Jeremiah 1:5

KTP YOUTH RECREATION CENTRE (YRC)

Kristian Thalai Pâwlin kum 1987 atanga hma an lo lâk tawhna Youth Recreation Centre (YRC) chu chhunzawm zêlin Hlimen rama an hmun a remchân loh hnuin Synod-in Falkland (Zemabâwk)-a Pu Sângsiam a ram a lei chu CKTP YRC atân hman a remti a (SEC 251:46). Building awm sa thiah leh a bungraw thiar hnatlâng kohvah Aizâwl khawpui chhûng Bialte hnatlângin tha 2,019 lai sên a ni a.

Ram zau tâwk tak, *bigha* 13 laia zauvah hian YRC ruangam tûr pawh siam fel a ni tawh a, Architect atân Landmark Architectural & Engineering Consultant te rawih an ni. Architech Project Estimate leh Plan pawh Synod Property Department-in pawmin, a hnuah SEC pawhin a pawm ve leh tawh a ni {SEC 256:32(3)}.

YRC-ah hian hêng a hnuaia mite hi awm tûra ruahman a ni—

A. AUDITORIUM

1. Auditorium Block-I : Mi 1,000 leng.
2. Auditorium Block-II: Mi 500 leng.
3. Basement Parking : Motor Park-na tha tâwk tak Car 80, Two Wheelers 124 leh Bus 5 dah theihna. Aditorium hi Bial/Branch ten Retreat, Camping, Crusade, Seminar, Concert, Musical Night etc atâna hman theih tûra ruahman a ni.

B. CONVENTION CENTRE

1. Conference Room : Mi 100 leng, room tha tâwk tak.
2. Lounge, Reception : Mipuiina tangkai taka an hman tûrin Lounge leh Reception changtlung tak. Convention Centre-ah hian YRC Office a awm ang a. Conference Room hi consultation, committee etc. atâna remchâng tak tûr a ni.

C. GUEST ACCOMODATION BLOCK

1. Guest Room :
a) Single Room - 10
b) Double Room - 15

2. Dormitory :

- a) Mipa 70 riah theihna tûr room pahni.
 - b) Hmeichhia 70 riah theihna tûr room pahni.
3. Choka changtlung tak leh mi 500 len theihna tûr Dining Hall.

Hêng room hrang hrangte hi ram pân lam mikhual thlen nân te, Bial/Branch Retreat, Camping, etc. atân te a tangkai ang.

D. OTHER AMENITIES (Thil dang awm tûra ruahman)

1. Football Ground
2. Basketball Court
3. Fianrial tawngtâina hmun
4. Blanket sùkna
5. Swimming Pool
6. Pâwna ei leh in nuam taka buatsaih theihna hmun.

KTP te hi Bial/Branch sport, blanket sùk etc leh member hlate hnuh hnaih nân leh active member-te kan inpawh leh zual nân kum tina programme hrang hrang siam thîn an nih avângin chutiang atâna a ruahman a ni. Hêng bâkah hian Bial/Branch huapa tawngtâina hmun pawh ruahman a ni bawh.

Hêng thil hrang hrangte hi puitlin tûr hian sum a ngaih tam dâwn avângin KTP ten an thawh khâwm Central Committee chuan funding zawn thain a hria a, Synod Executive Committee-ah phalna a dîl a, SEC pawhin a phalsak tawh nghe nghe {SEC 256:32(3)}. Funding chungchâng hi an buaipui mêk a ni. Hêng ruahmanna hi a hlawhtlin hunah chuan KTP tân hmun pawimawh a nih ang bawkin Kohhran tân leh ram tân pawh ro tling tak a ni ngei ang tih CKTP chuan a beisei a ni.

PATHIAN THU ZIR DUH TÂN

Presbyterian Bible School, Mission Vêng, Aizâwlah C.Th (Certificate in Theology) zir tûr lâk a ni leh dâwn a, dîl duh chuan hêng hi hriat tûr a ni e:

1. Admission Form : PBS Office-ah ₹ 10 a lei tûr a ni a, August 25, 2015 (Thawhlehi) tlai dâr 3 thleng PBS Office-ah theh luh theih a ni. Dîltu chu kum 16 aia naupang lo, Kohhran dân chhûnga awm a ni tûr a ni.
2. Interview hun : August 25, 2015 (Ningani) chawhma dâr 10:00 Tlingte chu September 1, 2015 (Thawhlehi)-ah Class tan tûr a ni.
3. Zir hun chhûng : September-December 2015
Hostel a awm lo va, zirlai pakhat hnênah thla tin ₹ 500 stipend pêk a ni.

Sd/- Rev. Lalneihvûra
Principal
Presbyterian Bible School